

INUIT ATAQATIGIIT

Inatsisartuni



UKA 2018/pkt.nr. 19
Ulloq 5. Oktober 2018
Stine Egede

Kalaallit Nunaanni pinerluttulerinermi inatsisip aamma Kalaallit Nunaanni eqqartuussisarnermut inatsisip (Kinguassiuutitigut pinerluuteqartarnerit il.il.) allanngortinnissaat pillugit inatsisissatut siunnersuummut missingiummut Namminersorlutik Oqartussat isumaqataanissaat pillugu Inatsisartut aalajangiiffigisassaattut siunnersuut

(Isumaginninnermut Inatsisinillu Atuutsitsinermut Naalakkersuisoq)

Siullermik qujaffigiumavarput suliassamik uuminnga aallartitsisimasoq, naluneqanngitsut nunatsinni kinguassiuutitigut atornerluinerit annertoorejussuupput, suullu allat tamaasa ilutigalugit aamma periutsit "ineriartorput", taamaalillunilu inatsisit atuuttut ilaatigut tulluarunnaartarput.

Dansket nutarterineri maliinnarnagit nunatsinni pissutsit eqqumaffigeqquneqarsimammata qujaruppagut.

Ilaatigut inatsimmi oqaatsit paasiuminarsarneqarnissaat isumaqatigaavut.

Inoqatigiit katitigaasarnerisa kingunerisaanik, (meerarsiaveqarneq – meerarsiaqartarnerlu) eqqarsaatigineqarsimammata qujanarpoq.

Meeqqat 12-it inorlugit ukiullit § 77-imi ilanngunneqarnissaat, isumaqatigaarput, apeqqusernartilluguli ilumut 12-nut killeqassanersoq, imaluunniit 15-it tulluarnerunnginnersoq, tassami meerarpassuaqarpoq inerisimassutsimikkut ilaatigut perungavallaanngitsunik. Illuanilli aamma 11-nik ukiullit ilaatigut perungasorujussuusinnaallutik.

§ 78, stk. 3-mut tunngatillugu oqaaseq "paaqqinnittarfiit" pineqarmata ersarissartikkusupparput utoqqaat illui/angerlarsimaffii tassani ilaatinneqarnersut. Toqqaanartumimmi parnaarussivinni politiinullu paarsissut ilaatigut toqqaannartumik taaneqarput, kingornalu taaneqartuni immikkoortuni ilaatigut meeqqanik paaqqinniffiit kisimik pineqarlutik.

Suiaassuseqatigiitaaq suaassuseqatigiinngitsutulli toqqaannartumik unnerluussinerni periarfissaqalersinneqalissammata malugaarput, tamannalu pissusissamisoorpoq. Taamaalillunilu § 82-ip atorunnaarnissaa aamma inissaminiippoq.

Ataatimut isigalugu inatsisissatut siunnersuutip pineqaatissiisarnermi periarfissaqalertitsinissaq assigiinngitsutigut ammaatissavaa. Tamannalu toqqissisimanaraarput.

Pinerluttulerinermi kiisalu Eqqartuuisarnermi inatsisit allannguutissaanik siunnersuutip ataatimiititaliani oqallisigilluarneqarnissaa qularutiginnilarput, taamaattumik qilanaarluta peqataassaagut.

Naggataatigut oqaatigiumavarput inatsimmik allanngueq imminermini naammanngilaq, kinguaassiuutitigulli atonerluinerup pinngitsoortinnissaannut tamatta akisussaaffeqarpugut, ilaatigut meeqqanik sumiginnaanerup annikillisikkiartornissaa annertuumik soqutigisariaqarpagut, tamannalu annertuumik suliassaavoq minnerunngitsumik aningaasatigut. Taamaammattut sutigut tamatigut aningaasartalinnik eqqartuinitinni, ingammik suliassani angisoorsuarni, puijunngisaannaggavagut isumaginninnikkut, pingaartumillu sumiginnaanerup tungaatigut nunatsinni piffinni tamani, annertuumik suliassaqaratta.

Nalunngilarpummi kinguaassiuutitigut atonerluinerit, taamalu meeqqanik innarliinerit, amerlasuutigut meeqqat sumiginnagaanerini pisarmata, erseqqissassavarali angajoqqaat paarsilluaraluartulluunniit ajoraluartumik tamaattunik aamma naapitaqartarmata.

Taamannak oqaaseqarluta ataatimiititaliamut susassaqartumut suliareqqitassanngorlugu ingerlateqqipparput.

Qujanaq